



MP temi nütsüing crore 144 dang
tatok meshitsüla: Umesh Patel

Bournemouth-i Morocco
nunger winger Adli alizükogo

ANPSTA-i primary tesayur mapa tazüing 1,168 aliba shimtsü akhanger

Dimapur, Luroi/August 22 (TYO): All Nagaland Pre-Service Teachers' Association (ANPSTA) ajanga Department of School Education (DoSE) dang primary tesayur mapa tazüing 1,168 aliba tekeraba nung shim tenzüksü aser Supreme Court totuyuba nung aliba ama 'age relaxation' aser 'eligibility criteria' jangjatsü ajungshia liasü.

Hokulbarnü Principal Director, School Education nem tezüluba ka agütsüba nung, mapa tazüing aliba ya hopta ana tsüingta Nagaland Staff Selection Board (NSSB) ajanga requisition asütsü ajungshi aser Office Memorandum No. CAB-2/2013(PT) nung aliba cabinet temeltetba athishia liasü.

Primary tesayur asoshi 'open recruitment' ya küm ter (10) dak tema magi arur aser yamaji menuba yong temsüa aliba candidate atema 'age relaxation' ya küm ter alitsüla, ta ANPSTA-

i ashi. Parnokisa qualification aser eligibility criteria indanga jangjashitsütsü ashi aser 'essential qualification' ya sorkari agizüka aliba reju ka nungi D.El.Ed degree asütsüla ta ashi.

Recruitment ya Supreme Court ajanga August 2023 nüng tuyuba ama D.El.Ed (Diploma in Elementary Education) mesüra PSTE trainees atema kisüing asütsüla aser item posts atema M.Ed, B.Ed, ECCE mesüra Montessori trainees khenyongi malitsüla, ta ANPSTA ajanga ashi.

Nübu shimya yimya ya merit nung ajemdaker alitsüla aser education jenjang raksatsüsa reservation mesüra quota malitsüla, aser temsüa aliba nübu kisüing shimtsüla, ta ashi.

Item nüngdakbatem shidak mamshira, onoki mera agiba aser timtem ajuruba atema department khuret asütsü, ta parnokisa ashi.

NSSB-i ANM/FHW shimba tatidang magitsü sangdongogo

Dimapur, Luroi/August 22 (TYO): Gauhati High Court, Kohima Bench ajanga obendang agütsüba tashi angaa, Nagaland Staff Selection Board (NSSB)-i Department of Health and Family Welfare nung Auxiliary Nurse Midwife/Female Health Worker (ANM/FHW) indang posts 61 asoshi recruitment examination magitsü sangdongogo.

NSB sangdong ka ajanga ashiba agi, item posts asoshi

eligibility aser educational criteria tejangjaba kumdaktsütsü asoshi state sorkar dang Nagaland Nursing Services Rules, 1988 yanglushitsü court totuyuba nung ajemdaker iba tatidang ya magir. Iba temelenshi ya anogo 45 tsüingta yanglushitsüla.

Ozüing ya yanglushiba sülen Department of Health and Family Welfare dang Regulation 14 of the NSSB Regulations, 2020 nung shia aliba ama anogo 15

Nirmal Jain ken o nung terenlokba melira onoki mera agitsü: DNSU



Hokulbarnü Dimapur nung Dimapur Naga Students' Union (DNSU) ketdangsür temi osangbener den jembidang tangokba noksa ka yangi angur.

Dimapur, Luroi/August 22 (TYO): Indigenous certificate taila amshi ta tai tonglokja alisang Nirmal Jain anema administration aser özüing amshiba agency temi mera magira onoki sashi-sashia nokdaksü aser timtem tulu alitsü, ta Dimapur Naga Students' Union (DNSU) ajanga tekum dangtsü ashi.

Onoki onok sasa mera agitsü, kechiaser ibai Naga nunger asoshi tebilemtsü tulu lir, ta DNSU ketdangsür temi Hokulbarnü osangbener senden ka nung ashi. July 14 nü DNSU ajanga district administration nem

anogo 15 sükzüksüba süyiba sülen parnoki iba osang ya metetdaktsü.

Onoki ultimatum agütsüba sülen Jain ya temang majung ta kuli agüja mapang tatsüka atema state yutsür ao. Ketdangsür temi show-cause notice ka agütsü aser pa dang documents tem bener arutsü tuyu, saka Jain-i yamaji meinyak, ta DNSU leniri ashi.

Tang tashi administration nungi mera tejangja ka magiteter asünungji, DNSU den özü units temi osang aru matatsü, saka özü sasa iba ken o bushisüngdanga mera agitsü aser tesüiba mapang majangshidangba mapa inyaktsü, ta ashi.

Aibelener nem jelia tekum dangtsü mashitsü saka kechi mera agidir nübur nem metetdaktsütsü, ta ashi.

Parnokisa Jain ya Nagaland-i meypa shilangogo ta metetdaktsü. Onoki certificate talila amshiba kuli tejangja agütsüogo aser ketdangsür dang Jain-i mapa tamajung inyakba bushisüngdangtsü ajungshiogo, ta DNSU tiri ashi.

Pa indang certificate ya komaka tejangja, aji sorkar,

administration, DNSU aser Naga nunger dang rasaa ashitsü Nirmal Jain mapa lir, ta pai ashi.

"Nüburtem kanga yongya atar, aser DNSU den Naga nungeri mera magira, ibaji Naga nunger puti otsü nung tensa tamajungtiba ka asütsü," ta DNSU tiri ashi aser Jain indang advocate dang ketdangsür matsüingdangi kuli tejangja bener arua sayutsü ayongzüik.

Onok ket nung kuli tejangja lir asünung, onoki FIR benoka Jain aputsü shir lila, saka certificate ya administration-i agütsü asünung parnok dangi ao, ta DNSU ajanga ashi.

"Onoki ketdangsür dang pa indang Indigenous Certificate magitsü ta sangdongang aser pa ket nungi ali-kimong meshia sorkar nem agüjang ta asüingdang. Naga nunger nem agütsüba temeden pai maneni mamshitsüla," ta ashi.

Iba ken o temai adoktsüba sülen Jain-i DNSU anema tenüng menüktsüba ken o benoktsü amokmeren aser union den jembishinü akaba mapang lir ta tiazü o prokshi. Ano DNSU-i sen crore ka agizüker ta olulu prokshi, ta DNSU ketdangsür ajangasa ashi.

"Onoki özüing mamshitsü, saka Naga nunger kumzüka ayutsü nungloksüba özüing amshirtemi par mapa meinyaktetera, onoki inyaktsüsa akumtsü aser Jain bhukumer temai adoktsütsü," ta ashi.

Parnoki sorkar dang iba ken o süoki ia agitsü ayongzüik aser ita ana dak tema süyiaka administration nungi ola madokba asoshi jashiba lemsatapa liasü.

Nagaland tesayur 52-i grade pay timba meshiba High Court-i magizük

Dimapur, Luroi/August 22 (TYO): Nagaland nung Post Graduate Teachers (PGTs) 52-i 2014 nung upgrade asüba PGTs tem den sako grade pay meshiba Gauhati High Court indang Kohima Bench ajanga magizük aser telok ana ya service rules balala küboki aiter ta ashi.

Iba ken o ya August 19 nü jembi aser obendang ya Hokulbarnü Justice Mridul Kumar Kalita-i agütsü.

Judgement order nung ashiba agi, petition agütsür (par 52) ya Graduate Teachers aser Primary Teachers posts nungi 2020 küm PGTs dang upgrade asü. Parnok yagi PGTs 2014 batch nem agütsüba ama grade pay sen 4,600 (Pay Matrix Level-12) agütsütsü temsüa lir, saka March 5, 2020 nü sangdongba kübok grade pay sen 4,400 (Pay Matrix Level-11) dang agütsür ta ashi.

Petitioner indang counsel ajanga ashiba agi, telok anaprong

ya Cabinet ajanga June 19, 2014 nü telemtetba agiba nung ajemdaker upgrade asü, anungji teyari kasa angutsüla, ta nokdak.

Ajidang masü Finance Department ajanga June 1, 2016 aser December 20, 2017 nung PGTs indang grade pay ya sen 4,600 asütsü shia aliba nunga ajemdak. Maneni parnoki Government Higher Secondary School PGTs for 2020-2021 indang incumbency list agütsüba nunga grade pay ya sen 4,600 ta shia lir.

Petitioner temi parnok bendanga amshir aser Constitution indang Article 14 nung aibelener ta tai tongloksü.

Item tesayur temi School Education indang Principal Secretary nem February 16, 2021 nü tezüluba nung takhangba ka agüja liasü. Ajisüaka sorkari service rules nung shia aliba kübok parnoki asüingdangba ama mamshitetsü

ta March 9, 2025 nung shia liasü.

Ano 2014 batch pur indang grade pay den sako magütsüba ya mapa kasa atema taa kasa agütsüba tamendak dak aibelener, ta parnoki ashi.

State tenüng nung sorkar indang advocate ajanga ashiba agi, 2014 aser 2020 upgrades ya legal regimes balala küboki aiter ta ashi. 2014 nung posts 262 upgrade asüba ya Nagaland School Education Service Rules, 2002 küboki aiter, kong pay scale ya grade pay sen 4,600 den sako asütsü shia lir. Ajisüaka ken o benokertem ya 2020 küm Nagaland School Education Service Rules, 2017 kübok upgrade asü, kong category temeja ana lir - PGT (Junior Grade-III) koba grade pay sen 4,400 aser Senior PGT (Junior Grade-II) koba grade pay sen 4,600 agütsür.

Petitioner ya Junior Grade-III

category kübok lir, koba March 5, 2020 sangdong nung tejangja shia lir, ta sorkar asoshi nokdakeri ashi.

State-i incumbency list nung grade pay sen 4,600 ta aliba ya 'clerical errors' lir ta ashi. Aser Finance department ajanga sangdongba ya interdepartmental tsüingta osang agitepba dang lir ta state-i ashi.

Item onüktem kanga junga asadanga sülen petitioner ajanga benokba ya magitettsü ta Court-i ashi. March 5, 2020 sangdong nungya Pay Level-11 (INR 40,800-1,29,200) ta jangja-jangja shia lir aser item ya official gazette nung adokogo, aser ibaji tatembang ta ashi. Finance department ajanga sangdongba ya inter-departmental communication ka dang lira ser yangji petitioner bhukuma temeden agütsüba mali ta Court ajanga ashi.

Court-i Nagaland School

Education Service Rules, 2017 indang Schedule-II athishia ashi, kong PGT (Junior Gr.-III) tem grade pay sen 4,400 angutsü aser Senior PGT dang grade pay sen 4,600 angutsü shia lir.

2014 batch den balala agütsüba dak sendakba nung, mezüingbuba telok ya 2002 Rules kübok upgrade asü aser 2020 batch ya 2017 Rules küboki aiter, ta Court-i tuteta ashi. Petitioner aser 2014 küm shimba Post Graduate Teachers ya khenyongi yimya balala nung nokdaka lir aser parnok upgrade asüba mapanga Rules balala agi alena lir, ta obendang nung ashi.

Petitioner nem grade pay sen 4,400 agütsüba ya tapi agi lemteta agütsür masü aser Constitution of India indang Article 14 kübok temeden agüja aliba nung kecha yimya nunga aibelena mali, anungji iba writ petition ya agentsür, ta Court ajanga obendang agütsü.

Yachem nung Nasha Mukta Bharat Abhiyaan Awareness sentong agi



Dimapur, Luroi/August 22 (TYO): Government High School, Yachem, Longleng nung August 22 nü Nasha Mukta Bharat Abhiyaan Awareness sentong agiogo. Iba sentong ya District Administration Longleng aser Longleng District Legal Service Authority o Medical Department nung longjemer agia liasü. Sentong ya Pastor Yachem Baptist Church, Rev. Adao Phom-i sarasademer tenzüka liasü.

Medical Officer, Yachem, Dr. Visino Nakhro aser Deputy Legal Aid Defence Council Longleng, P. Monyei Phom nung shisalen sayur liasü.

O jemidang Dr. Visino Nakhro-i, Nasha Mukta Bharat Abhiyaan koba dang Drugs Free India campaign ta ajar iba sentong ya Ministry of Social Justice & Empowerment, Government of India-i 2020 küm August ita amenokba lir, ta ashi. Iba ya temesepba mozü achiba anema linük ajunga nung benoka inyakba sentong ka lir, koba awareness, prevention, counselling, treatment, de-addiction dak rangloker inyaker. India nung nüburtem aser talisa lanurtemi temesepba mozü achiba ya kanga lendong lir, kechiyong iba yagi mozü

achisang, par kibong aser lokti timtemi idaktsür, ta lai ashi.

Laisa, Cycle of Addiction, Categories of Psychotic Substances Used, Signs & Symptoms of Substance abuse, Impact of drug Abuse & Addiction, Mental Health, Family Impact, Social & Behavioral Impact, Support & Treatment Services, Prevention Awareness, Counselling & Psychological Support, Medical Treatment & Rehabilitation, Community & Family Involvement aser Policy & Governance onük nung ajemdaker jembia liasü.

Lai ashiba agi, lanurtemi medemer tamajung nungi pila alitsüla aser lokti-i lanurtem kümzüka ayutsüla aser temesepba mozü achiba agi kangshirtem sentoka metoktsü nongita yaritsüla, kechiyong mozü achiba ya ozüng raksaba ka masü saka tashidak ka aser iba atema temeim sayutsü aser treatment nungdaker.

Kasa mapang nung P. Monyei Phom-i, District Legal Service Authority-i service balala agütsüba indang metetdaksü aser Legal Drugs, Illegal Drugs, drugs abuse ji kechi, Narcotic Drugs aser Psychotropic substances Act

1985 amala onük dak ajemdaker jembia liasü. Laisa, NDPS Act, temerenshi, Longleng nung achiba temesepba mozütem, temesepba mozü achirtem tepuokdaki yokba ajanga timtem adokba, drugs addict tem atema tanga lenmang kar, mozü achirtem mesenmetui amshiba, Longleng district nung ken o benokba statistics, NDPS + Theft cases den tanga ken o medemdangba aser district nung temesepba mozü achiba nung sen kwi intoker iba indang metetdaksü liasü.

Maneni lai temesepba mozü achiba azüoktsü atema lokti dak tulu ka keta lir aser police o okadak yabo temerenshi agütsütsü atema dang lir, ta ashi. Laisa, temerenshi agütsüba ajanga temesepba mozü achiba maziokteter ta bushisüngdang ajanga ngutetogo ta ashiba den ajak dang Longleng ya temesepba mozü nungi pila aliba district ka kümdaktsütsü asoshi inyaktsü mepeshia liasü.

Sentong nungsa AHM, GHS Yachem, Ashutosh Samal-i anüküp o jembia liasü. Sentong ya EAC Yachem, C. Tsalimse Sangtam lenisüba nung agi aser Pastor Noksosang, T.I. Lakpa-i sarasademer tembang liasü.

31buba NSF General Conference Tseminyu nung agitsü

Kohima, Luroi/August 22 (TYO): 31buba Naga Students' Federation (NSF) general conference August 27 nungi 30 tashi RSA Ground, Tseminyu nung agitsü. Iba sentong ya "Resilience in Transition" omen nung ajemdaker agitsü.

Conference Central Organising Committee Convenor, K. Elu Ndong-i ashiba agi, anogo pezü agitsü aliba senden nung R. Lungleng lenisüba nung "Youth as the Bridge to Our Political Future," omen nung ajemdaker panel discussion agitsü aser iba sentong nung panelist temji Achumbemo Kikon, Nepuni Piku, Ningreichon Tungshang,

aser Dr. Lanusashi Longkumer nung asütsü.

August 27 nü introductory session nung Lok Sabha MP S. Supongmeren Jamir-i shilem agitsü aser tasüngnü Rural Development and SIRD Minister Metsubo Jamir-i conference lapoktsütsü.

Conference nung mejeta jaokertem rongnung J. Kumo Sha (MLA, Karong, Manipur), S. Toiho Yephthomi (NLA Deputy Speaker), Abu Metha (Chairman, IDAN), Laisam Simai (MLA, Arunachal Pradesh nung densema lir aser MLA Jwenga Seb (Chairman Tseminyu SPDB) host asütsü.

NSF tir Medovi Rhi-i ashiba

agi, iba conference ya Rengma Students' Union-i achaynga agitsü. Conference amenokba sentong ya August 27 nü 11:30 ako nungi tenzüka agitsü aser introductory session 5 ako nungi tenzüktütsü.

Co-convenor Kesosul Christopher Ltu-i kaketshirtem dang iba sentong nung shilem agitsü mepeshiba den taküm omen ajanga shisaluyim, employment, skills, infrastructure, aser maitsü dak sendakba nung tetsükdaktsütem indang jembir, ta ashi.

2025-2027 atema ketdangpur tasentem election August 29 nü agitsü aser iba sülen tasüngnü senshitsu.

ADC Tizit-i plastic osettem nokdanger

Dimapur, Luroi/August 22 (TYO): Sorkar tetuyuba dak ajemdaker aser plastic jana agi tzümopung menentsüba apir Tizit Additional Deputy Commissioner (ADC) Relise Sangtam-i sangdong ka ajanga September 1 nü nungi Tizit sub-division nung khi dang amshiba plastic osettem mamshitsu ta metetdaksüogo.

Kasa sangdong ajanga

ashiba agi, khi atema amshiba plastic bottle tem, carry bag tem koda melemaka mesüra kechi sentsü südir süaka mamshitsu aser plastic tzu bottle litre ka dak tekübok amshitsu memelatsü.

Iba tetuyuba ya shitak benoka inyaktsü atema enforcement team-i mapangshia meita aotsü. Aibelenertem dang mezüngbuba aibelenba mapang

senchi sen 10,000 achitsu aser tanaben aibelenra senchi sen 20,000. Iba sülen ano maneni aibelenra trade license thitsütsü.

ADC-i nüburtem dang tzümopung den apet tanga osettem amshitsu aser sub-division temerekba kümdaktsütsü aser tzümopung atema khuret angateta inyaksangshiba sub-division ka yangertsü atema teyari agütsütsü ayongzüko.

Achumbemo Kikon-i consultative senden ayonger

Dimapur, Luroi/August 22 (TYO): MLA aser Committee on Environment and Climate Change mendenbuba Achumbemo Kikon-i Kohima Municipal Council, Kohima Chamber of Commerce & Industry aser Colony Chairperson tem den consultative senden ka ayongogo.

Iba senden ya August 26 nü 11 ako nungi tenzüka K. Shikhu Conference Hall, Nagaland Legislative Assembly Secretariat, Kohima nung amentsü.

Züngsem ajak dang iba senden nung mapang agüja arua adentsü mepeshia metetdaksüogo.

Swachhta Action Plan kübok Vermicomposting training agi



Dimapur, Luroi/August 22 (TYO): Krishi Vigyan Kendra Mokochung-i ayongzüka vermikomposting dak sendakba nung hands on training den repsema method demonstration sentong ayongzüka agiogo.

Iba training ya Women Ministry tawabangba kübok Marep colony nung July 23 aser Aliba yimtsüng nung aluyimertem atema August 21 nü ayongzüka katsüogo.

Training sentong ya vermikomposting dak sendakba nung Swachhta Action Plan (SAP) nung shilem ka ama alu nungi tintoktsü aliba songulemba balala amshia tangazükba agütsüogo.

Sentong nung shilem agirtem nem technical tsütsü

tangazükba agütsüba den vermikompost yanglutsü atema tsüla amshiba yimya, vermi unit anepaluba yimya aser mol agizükba yimya sayua liasü. Maneni parnok nemsaluyimba nung vermikompost amshitsu koda tongtibang iba indang tangazükba agüja liasü.

Kendra-i sentong nung shilem agirtem nem pei kidang pei unit amenoktsü atema HDPE vermi bed aser tsüla agütsü, koba parnok alu nung amshitetsü.

Kendra-isa, parnok ya vermikompost producer tem ama tangar asoshi nükdangtong akümtsü ta amanger aser vermikomposting technology ya tanga aluyimertemia angazükba inyaktsü imlar.

Zunheboto nung angati Surgical Camp kaakatsü

Dimapur, Luroi/August 22 (TYO): Chief Minister's Mobile Operation Theatre (CM-MOT) kübok August 25 nü District Hospital, Zunheboto nung angati Surgical Camp k ayongzüka agitsü. Iba camp ya MLA, Dr. Tseilhoutuo Rhutso-i anir specialist doctor tem team kati achaynga agitsü.

Nüburtem aser surgical aser talisa diagnostic service agitsü tetsükdaktsü ajangshia aliba kinük nung alirtem nem angati aser specialized healthcare agütsütsü nükjidong nung iba camp ayongzüko. Camp mapang general surgeries, obstetrics & gynaecology, orthopaedics, dental, aser ENT service tem agütsütsü. Ajisüaka tenük aser tenarong atema surgery densema mali.

Temang nung timtem alirtem shirnok taoba mapang surgery agitsü atema refer asü

saka magiteti ali parnoki iba facility agitettsü, ajisüaka parnoki parnok indang medical record aser report tem bena alitsüla. Surgery agitsü atema tetuyuba agütsür alirtem dang iba camp nung adentsü metetdaksüogo.

Beneficiaries tem dang tenüng züngoksemba mapang lira parnok indang CMHIS card bener arutsü mepeshia metetdaksüogo. Osang tejangjaba agitsü atema nüburtemi item number; 9612130407/8258918638 nung tongteprateptetsü ta metetdaksüogo.

Kasa mapang nung DC Zunheboto, Dharam Raj IAS-i, nüburtem dang iba maangka ya agitsü ayongzüka den, iba camp yagi nüburtem nem specialized healthcare agütsüba nung tongtibang shilem agitsü, ta ashi.



New Delhi, August 22, 2025: Hokolbarnü Returning Officer aser Rajya Sabha Secretary General, Pramod Chandra Mody, Union Minister of Parliamentary Affairs Kiren Rijiju aser tangartemi linük tatong Tir election atema agütsüba nomination papers reprangdang tangokba noksa nung angur.

Maharashtra nung anogo shia aluyimer 6 soseta asür: Congress

New Delhi, August 22 (Agencies): Hokolbarnü Maharashtra Congress Tir, Harshwardhan Sapkal-i, state nung anogo shia aluyimer trok soseta asür, ajisüaka Mahayuti teloktep sorkari iba atemaji tebilemtsü makar, ta metetdaksü.

Mumbai nung osangbenertem den jembidang Sapkal-i, state nung aluyimertem dang kanga menoa sentsüh matokba atema Devendra Fadnavis-i aniba sorkar aitsü.

"Iba sorkar ya kentok ama teküp temelem dang masü saka tenük tapok, temeli tatsük aser tenarong tajak. Aluyimertem timtemji parnoki memeteter. BJP-i aniba teloktep sorkar ya aluyimer anemertem lir. Kechiba

aluyimertem dang sentsüh atoktsü atema sign asütsü asoshi Devendra Fadnavis, Eknath Shinde aser Ajit Pawar nungeri pen mamshir," ta pai ashi.

Ahilyanagar kübok Nevasa taluka nung aluyimer, Babasaheb Subhash Sarode soseta asüba dak sendakba nung Congress leniri, Sarode-i video ka tangoka liasü, aser iba video nungji pai pa sentsüh tokdaksünüba lemsatepa lir, ajisüaka sorkari aluyimertem atema meinyakba agi pai soseta asü, ta metetdaksü.

"Tanü-a sorkari, 'Onoki mapang shidak nung sentsüh atoktsü' ta ashir. Ajisüaka mapang shidakji matongdang aluyimer kwi soseta sädaksütsü?" ta pai asündang. Taoba Hombarnü state

Revenue Minister, Chandrashekhar Bawankule-i, sorkari nüngdakba aluyimertem dang sentsüha atoktsü, ki aser farmhouse asürtem dangbo sentsüh matoktsü, ta sangdonga liasü.

Minister-i, alu nung tera dang züsentetba aluyimertem, loan agia alirtem aser soseta asütsüsa aliba aluyimer nem sorkari teyari agütsütsü meranger, ajisüaka sentsüh ajakbo matoktsü, ta metetdakja liasü.

State assembly nung sorkari, aluyimertem dang sentsüh atoktsü aser iba dak sendakba inyaksangshitsü atema committee ka tentetogo; kodang committee-i report ji agütsüdir iba sülen ang telemtetba agitsü, ta metetdakja liasü.

MP temi nütsüng crore 144 dang tatok meshitsüla: Umesh Patel

New Delhi, Luroi/August 22 (Agencies): Tzüngluruwa mongpu Parliament senden tatembangbuba anogo nung (Brihostibarnü) Daman & Diu nungi Independent MP, Umesh Patel-i Parliament nung ozülu ka amer longkak aita ruling aser opposition MP ajaki linük nung nütsüng crore 144 dang tatok meshitsüla, ta takhangba agüja longkak ait.

Pai ama aliba banner nungji yamai zülua liasü, "Ruling aser opposition party temi nüburtem dang tatok meshitsüla."

Parliament senden nung senotsü jenti indoker, ajisüaka rongrong adoka senden junga magitet, anungji sen teindokbaji

MP temi menoktsüla, ta pai ashi.

"Kodang senden junga mekatetlir linük rongsen amajok nung laluba atema ruling aser opposition party temi nütsüng crore 144 dang tatok meshitsüla," ta Patel-i ashi.

Senden junga magitetba ya tejashitsüka aser tia maka; ruling aser opposition napronglai nüburtem teimla mataloktsü, ta pai metetdaksü.

"Ruling party aser opposition napronglai parnoki inyaknüba ajak inyak. Democracy tekülem kidang (Parliament) parnoki nüburtem crore 144-i imlaba mataloktsü. Kanga tongtibang bill aika benok aser bill kar atemabo o melemtepi

liasü. Income Tax bill bo tapak 600 liasü saka iba atemaji minute 6-a mejungi o lemtepa liasü. Yashi aser tanü naprong second 30 tsüngda senden tembanga liasü," ta paisa metetdaksü.

Parliament senden junga magitetba atema MP tem itasen nungi sen katitsüla, ta pai ashi. "Ni sorkar dang tzüngluruwa mongpu senden atema MP tem nem itasen magütsütsü mepishir aser Parliament akadang teindokba senotsüji MP tem itasen nungi katitsüla. Senden junga magitetba atema kechiba tai maket nüburtem senotsü indoktsü?" ta pai ashi.



August 22, 2025 nü Bihar nung Lok Sabha nung opposition lenir, Rahul Gandhi-i 'Voter Adhikar Yatra' nung shilem agidang tangokba noksa nung angur.

PM Modi-i August 29 nü Japan semdangtsü

New Delhi, Luroi/August 22 (Agencies): Japan Ato kilonser Shigeru Ishiba-i jaokba ama August 29 nü Ato kilonser, Narendra Modi-i Japan semdangtsü.

Iba sülen pa China-i oa Tianjin yimti nung ayongzükba Shanghai Cooperation Organisation (SCO) Summit nung adentsü.

August 29 nungi September 1 tashi nung pai linük ana nungji tongtibang senden aika nung adentsü. August 29-30 anogotem nung pa 15buba India-Japan Annual Summit nung adentsü. Tang agi pai tibenbuba Japan semdangtsü aser tang mezüng Japan Ato kilonser, Ishiba den senden amentsü.

Lenir anati India aser Japan na tsüngda Special Strategic & Global Partnership jenjang asadangtsü. India aser Japan na

defence & security, shishilembaba aser rongsenkettzüng, technology & innovation sectors nung amalitepa inyaker.

Tenatisa regional aser International onüktem nung o lemteptsü.

August 31 nü Modi China-i aotsü aser SCO Summit nung adentsü.

China-i ashiba agi, iba summit ya SCO puti otsü nung senden tulutiba asütsü, kechiyong alima nung lenir 20 dak temai iba senden nung shilem agitsü ta metetdaksüogo.

SCO senden aliba mapang nung Ato kilonser Modi-i linük balala nungi lenirtem den jurila senden amentsü tebilemba lir.

2017 küm India-a SCO nung züngsem aküm aser 2022-23 kümsük nung India Tir liasü.

Supreme Court-i azü nem vaccine agütsüba sülen chioktsü tuyu



August 22, 2025 nü New Delhi nung Supreme Court (SC) kima kibur maliba azü ka nemzüa aliba noksa nung angur. Hokolbarnü Supreme Court-i Delhi-NCR nung aliba azü ajak pua sterilise asüba den vaccine agütsüba sülen kasa tesem nungjisa chiokang, ta tetuyuba agütsüogo.

New Delhi, August 22 (Agencies): Tawa Supreme Court-i hopta 8 tsüngda Delhi-NCR nung kibur maliba azü ajak pua shelters nung puoktsü atema ketdangsertem dang tuyua liasü.

Ajisüaka azü meimertemi aser shiruru temeden atema inyakertemi longkak aitba den külemi doctor tema aikati SC dang iba tetuyuba agiena atatsü mepishiba sülen Hokolbarnü Supreme Court-i tetuyuba tasen ka agütsüogo.

Supreme Court-i municipal ketdangsertem dang azü 'sterilize' asüba den külemi vaccine agütsüba sülen azü apuba tesem nungjisa chioktsü tetuyuba agütsü.

Judge aseme akümbe bench-i azü sterilise asüba aser vaccine agütsüba sülen chioktsüla, ajisüaka azü tesashi mesüra rabies tashidak keta aliba azütembo mechioki shelters nung ayutsüla, ta tetuyuba agütsü.

Supreme Court-i, azüji sterilize asütsüla aser yimti lenmangtem nung azü nem chiyungtsü magütsütsüla, ta metetdaksü.

SC-i municipal ketdangsertem dang nüburtem kümzüka alitsü aser yimti lenmang merüka alitsü atema

azü nem chiyungtsü agütsütsü atema tesem kar lempzüka yujang, ta tuyu.

Joko Delhi-NCR nung dang masü saka linük tesem ajaklen municipal ketdangsertemi item tetuyuba benoka inyaktsü. Ketdangsertemi pepei tesem nung azü nem chiyungtsü agütsütsü atema tesem lempzüka yutsütsü aser rabies tashidak nokdangtsü atema inyaktsü.

Supreme Court tetuyuba tasenbaji Animal welfare organization aikati pelaa agizükogo.

August 11, 2025 nü Justices- J B Pardiwala aser R Mahadevan nati akümbe bench-i Delhi-NCR nung ketdangsertem dang yimti lenmang nung kibur maliba azü ajak pudena shelters nung puoka yuang, aser iba atemaji mezüngbuba shilem nung azü 5,000 ayutsü atema shelter ka tama yangluang, ta tetuyuba agüja liasü.

Delhi-NCR nung kibur mali nemzüba azü million 1 shi lir; talisa Noida, Ghaziabad aser Gurugram nungbo azü kanga arener.

India nung kibur maliba azü million aika lir aser alima nung rabies tashidak agi asürtem shilem 36 bo India nung lir (World Health Organization).



TIR YIMYIM YIMOBILEM (EDITORIAL)

DIMAPUR

KÜPTOKNÜ

LUROI 23, 2025

Bendanger lidaktsüba yimya

Asen lima nung dang masü saka alima kin shia pei limai bendanger kenyongi marudaktsü aser melidaktsütsüsa inyaktsübo maremtsü, kechiyong bendangertem arubaji kar pei senotsü bener arua amongtsü arur aser kar mapa inyaktsütsü arur, anungji alinük kati bendanger arubaji tajangzük bener arutsür. Ajisüaka, pei lima nung yimten temzüng ozüng aser inyakyim agi bendangertem arubaji azüoka, parnoka timtem majurutsü aser parnok arua amongba agi linük nunga timtem lendong aser takoksa mataloktsüsa meinyaktetra, bendangertemji lia liabo senso purtem dang nungi teimba, takarba aser tashi tuluba kümadoktsü, anungji meilongi meilongi bendangertemji lisopurtem amokseptsü. Ibaji dang masü saka bendangertem arua alirtem rongnungji kar nükjidongbo ozüangi memelaba mapa inyaktsü tebilemba nung arua alitsüa akok, anungji itemji ozüng agi mita mereprangi toktsüra, linük nung lendong agütsür kiralongrartemji itemji asütsü. Item tagitsü aser magitsü, tajangzük aser takoksa, temoatsü aser lendongtemji bilemdanga asenok Nagaland nunga tang nungi danga asentenshir asen den külemi bendangertem arua aliba ya tazüokba inyakyim ka kübok lidaktsütsü asoshi ozüngsa inyaktsü kanga nüngdaka kümogo. Iba teinyaktsü onük ya talisa tang nungi Dimapur nung ILP amshi tenzükba den külemi inyaka aotsü kanga rongdak nüngdaksa reprangtetba agi, NSF teloki government dang akangba asenoki angashiogo aser kasa onükji pusema yashi yakanü Confederation of Nagaland Chamber of Commerce and Industry purtemia metetdaktüsügo. Item teloktemi government nem inyakdaktünüba mapa kaji, Nagaland nung arua bara ki nung alir bendanger shia tenüng aser talidak tejangja den parnok aliba ki kibur tenüng aser temetettsütem ajak tejangja zülüoka ayuba inyakyim ' landlord-tenant registration system' lidaktsüner. Ibaji kodang asenoki jungjunga bilemdangdir, tangbo iba ama inyakyim maliba agi bendangertem shirnoksa kong nungi kechi atema arua shir kidang aliar mejangjateter. Anungji, bendanger kati sensosangertem ashiochtsür ajenyonga mebushitetter. Aji oda, tangarjibo yutsür ki kiburi par kidang alir bendangertem kechi inyakar memeteter. Ibaji ki kibur asoshia lendong lir. Talisa, Nagaland nungsa süaka Dimapur ama nung yabo, alima tesem balala nungi nisung ajung majung ajak arua lidagi. Item rongnungji , atangji, karbo ayanger aser mapa tajung inyakterema lir, saka ano karbo ozüangi memelaba mapa inyakterema lir. Item rongnung kari raraba osettem ayoker, kari mozü mora ayoker, kari yi ayoker, karbo temang ayoker aser karbo auyatsü aser rakzükrartemtsü asoshi amongertema lir. Item mapa tamajung ajakji pi kidang bara nung lia sademsadema inyaker. Atangji, nisung karbo pei kidang lia item mapa tamajungtemji inyaka alitsüa akok, anungi itemjia mitkartem putettsüsa mitkartem dak tashi aser temulungtetba alitsüla. Aji oda, kodang Nagaland nung bara kidang alir bendangertem den ki kiburtem tenüng zülüokba inyakyim tenzüka odir, ozüangi memelaba mapatem melamelaa nokdangtettsü, kechiyong pei tenüng zülüokdangji bendanger shiaji tenüng aser talidak dang masü saka pei teinyakdak mapa tenüng dena zülutsü. Iba denji bendanger shiaji kodang kong nungi aruar itemjia nüngdakba mapang melamelaa jangjatettsü. Tanü Nagaland nung, Dimapur nung dena, ILP amshitsü tenzükba ya bendangertem shinga Nagaland nung arua malitsüla ta masü saka arutsü asoshi temelaba nüngdaktü saka teti asoshibo arua alitsü makoktsü ta ozüng agi nokdangba mapa ka lir. Aji oda, Nagaland nungbo bendangertem mali Naga nungertemji nüngdak mapa aika meinyaktettsü, anungji merenloktettsü, iba jagi tangar state-tem dang nungibo Nagaland-sa bendangertem tenüngdakba akümer. Asenok asoshi tangatsü majung asütsüa akok, saka tangar limatem nung Naga nunger menügdaker saka asenokbo tangar kanga nüngdaker, anungji asenok den tangar teti alitsü. Iba jagi balaka asen lima nung arua bara ki nung alir bendangertem tenüng, mapa aser parnok ki kibur tenüngtem zülüokba yimten kaaket ka alitsü kanga nüngdaka kümogo.

OLEMSABANG

Sobaliba jayajako aser Salam ratet

P. Renthly Jamir.

Tamasa onük dangi marudang Tir Yim Yim Office nung inyakterem dang O ka shinür , Ni OSHI RAKSABA KULI, tasür züluba ocet tatembuba adok 11 Aug 2025 Amungnü ta zuluba ojang nung teinyakteremi ojang 125 anaben shilua (stanza ka repeat) enoksem. Anungji yasürbo ocet azünger aser tezülur ajak meratatsüsa yamala majimazüangkangkazüa meinyaktsü mepishir.

Asen Aor takar kika süpongchir liasü. Arürlepernokinketer liasü ano yimtsüyimbu yimsoyimosonger liasu. Kasajisa sensakpu lajar liasü, lapi nüsapur liasü, ano tebang nung temeli masem tamameteter liasü. Saka item takar nokinketer tashitawartem dangji sensaker mesomelirtemjagi akhümtsübu agüja tajurutepdang tulur ta tamarener ta (Sir, Madam) ajaba mali asü. Parnok naroküm kenbo tajung tesa mejema tentsü aser tenüngsang agütsüba yimya kecha mali asü, saka Aor sobaliba nung takar, makar, tashir, mashir ajak kasa tajurutepdang pei dang tantsü tambu pi O pi na asüyonga obou oba tambu, oba tanubo oko odi ano tanubo dang tanu ta tenur ta anük ta anükla ta ano tetsürtema otsü ta oja tantsü ojatanutsü, onü oya amo ta tenü tenüla ta ano aener ajurudang temba ta tembar ta jembia aru. Iba dak alema tanga O greetings salute anepdang, anüngdang, nikongdang, aonung , tajung ta ashiba mali asü.

Aor anogo ka nung mapang telemsa yamai ja-a aru, koba tanü asenoki ghonda 24 ta ajar. Tanü kwibaji ta ajaba melenä ya akhidang "kodang taje" ta ja-a aru.

- | | |
|---------------------------|--|
| 1. Mezüng ankong | - Tamasa an akongba anogo tetenzükba mapang. |
| 2. Tanaben ankong | - Ani tanabenbuba akongba. |
| 3. Tasemben ankong | - Ani asembenbuba akongba. |
| 4. Sangwabang | - Ano mesangwa saka talangka melie sangwatsü. |
| 5. Kibarürüa/züngia | - Joko tesangwar ano jungabo mesangwa. |
| 6. Tsükisen tialong | - Anepdang pei ayipdak ki nungi tsukisena aor. |
| 7. Tzütaontar tialong | - tetsür tanur ajak tzütai aoba mapang. |
| 8. Chiyungkiyung tialong | - Yimer ajak anepdang chi chiyungba mapang. |
| 9. Tasenlumungba mapang | - Chiyunger alui aoba mapang. |
| 10. Tasenküpli | - yimer ajak alui oseper, tasenküpli asü ama ta jembir. |
| 11. Terotu masangyong | - Alu nung mayongtsü dena süngo ajemba mapang. |
| 12. Anjungmeshi | - Aor asemben chiyunger anüngdang chiyungba mapang. |
| 13. Anjungmangar | - Anüngdang chiyunger joko mapang tatsüka or. |
| 14. Akpo arümeshi | - Kidang munger ak chi arüba mapang. |
| 15. Alu nunger adok | - Alui aortem adokba mapang. |
| 16. Nümaaia/Züngrema | - Joko nisungbo junga majiteter kangbo mammang. |
| 17. Chiyungkiyung tialong | - Aonung yimer ajak chiyungba mapang. |
| 18. Tsükisen mapang | - Aonung chiyunger ayipdaki tsükisena aoba. |
| 19. Teluludang | - Nisung ajak kidang kar yongsen mapa inyaker tetsür olangla inyaker kar ken tenshir kar otsü atongteper ta luluba mapang. |
| 20. Mejangsepli | - Yimer ajak amua osepeba mapang shinga mesenzür. |
| 21. Poklem/Ayatrem | - Ammang tiyong joko süngu tua marakzür. |
| 22. Ankongbang | - Joko An talangka melie akongtsü. |

Tanep mezüng An akongba nungi taonung An kongbang tashi anogo ka. Tanur ka ankongbang nung aso minute ishika lir an konger ka aso joko tena anogo balala, ka 2000 December 31 aonung an kongbang nung aso ka 2001 January ka anepdang An kongli aso tena joko century balala ta ajatsü. Asen tsurabur anütetsü melenä mapang yamai takzüa aru. Tanü asüng joko iba telemsa ajak yagi pezü küma yanglur.

1. Anepdang-Good morning anepdang tajung ta jateper.
2. Anüngdang-Good afternoon anogo tajung(tesangwa tajung ta masü)
3. Nikongdang- Good evening nikongdang tajung ta jateper.
4. Aonung - Good night aonung tajung (ammang tajung ta masü).

Kechiyong asen sobaliba nung mezüng ajurutepeba O (Address) akhümtsüba ashiba O kecha maka, saka awashi sayua lenmang aitsütsü khu bena lira ajia melenzüka bentsütsü ta liasü .Saka kodang tzümar den meyoktepa khristan yimsü aser British nunger aru parnok nungi SALAM ta ajaba ojang ya belenzüka jembi. Iba ojang ya English aser Hindi oshi masü saka Muslim tamangba yimsü (Religious salutation) nung yimjung, tesünep ta ajaba. Arabic oshi ta ashir. Ano yihuda nungeri ibri oshi nung shalom ta ajar, ojang ya Aori kodanga jembi maru aser sobaliba maparen dena sentaktepa mali. Asen tsurabur kodang asenok mesüra ana tsüngda yimjung mali ta shinüdir aso zükmar agütsür, Batio nung belepa shinü teper agütsütsü ano kidang aener anenra Aamchi nung chitem aam belapa temer agütsür . Iba dak alema tanga tamaitü mali.

Tanü joko salam ta asüba ya tanur kinü ita trok tenet jungerbo angazükdaktsür salam ta shira teka songteta adoker azü nema angzüdakja azüia salam ta shira pela-a sayur. Aser iba ojang ya laishiba sünga zülua lir tongtibangsa tenyarterm Paul shititem nungi shir Peter yohan shititem ajak nung salam salam ta angur. Rom shiti tapu 16 nungbo salam salam ta 22 ben zülua lir. Aser iba ya asenoki aibelena salem salem ta jembir zülur metetsümonga aibelener.

Joko lai meyipertemia aibelena züluba angur tawa tanü adokba NEW TESTAMENT (Study Bible by Goodnews Ministries) nung kar kar nung salem salem ta lir. Page 151 Luk 10:4 Rom 16:6 page 360 ano page 447 nunga tatem salem O ta zülua lir ajidang masü asenoki shiti züludang salem salem ta zülur anungji Ao osep nunga Salem ta zülua lir. Aser Salam ya Ao oshi masü anungji asenoki salam agi salem ta melentsü makok. Kechiaser asen sobaliba tsütsü ya benshia maru aser jayajako nung iba ojang ratetba mali. Aser tarutsü lanur putui iba ya literal meaning shitak ratetba tetezü telung tonga lua bushidang koba shitak ta ashitsü SALAM aser SALEM küm aika zülur jembi aruba Laishiba nung Salam ta zülua lir Rom tapu 16 nung 22 ben tashi alibaji koda? Aser tanü asüng osep nung salem ta zülur lir aji koda asütsü. Iba ya nübur ajak asoshi tongtibang ka ama lemsateper. Kechiyong memeteti aibelena aliba kaji tai-a ta kodang bushiteta putetdir idangji metongshitsü tim ta bilemer.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Dimapur Zone Ao Officers' Forum-i Nsong Town, Peren District nung ABAM-i lapokba School nung Free Medical Camp ka 22.8.2025 anogo nung CMO Peren den külem sür ayongzüka nungdakba purtem yariba sentong nung agiba noksa ka yangi angur. Iba school nung ya Class A nungi 8 tashi lir aser students ajak agi 326 lir. Iba school ya Peren district nung school tajungtem rongnung ka lir. Iba school nung Aotsür Aor tesayur parnok 11 lir aser headmasterji Molungchuket nunger Wb. Moatemsu Lkr lir. Item tesayurtemi bendanga agüja sayuba agi school ya kanga junga renloka odagi. (Nsong, August 22, 2025).

Eritrean Embassy-i Khristantemi mepishiba shidi magizük

Washington, Luroi/August 22 (Agencies): Brihostibarnü Washington D.C nung Eritrea Embassy kima Khristan melungtet teloktemi Eritrea linük nung küm 20 dak tali pua aliba Khristan lenir tenet chioktsü atema takhangba agütsüba sülen Embassy nem temepishiba shidi ka agütsü, ajisüaka magizük.

Eritrean Embassy kima meimchir temeden atema inyakertem aser Khristantemi Eritrea nung Orthodox putirtem densema Khristan lenir tenet tepuokdak nungi chiokang, ta takhangba agüja longkak ait.

Religious Liberty Partnership indang Voices for Justice campaign nungji 21 Wilberforce, Set My People Free, Christian Freedom International aser Jubilee Campaign-ia shilem agi. August 22 nü (Hokolbarnü) International Day Commemorating the Victims of Acts of Violence anogomong amongtsü anogo ka jelia Washington D.C nung aliba Eritrean Embassy kima longkak ait.

Hokolbarnü linük aika nung Khristan telok balalai Eritrea nung Khristan lenirtem maitsü ser nung küm 20 dak tali tepuokdak ayuba anema longkak aitogo.

Eritrea nung Khristan lenirtemji Wengel Mermera Criminal Investigation Centre nung puoka lir.

Eritrea Embassy kima longkak aitba sülen Christian Freedom International nungi Ella Elwin-i Embassy nem temepishiba shidi ka agütsütsü merang, ajisüaka embassy-i shidiji magizük.

Iba shidi nungji yimsü temeden atema inyakba advocacy organizations aser meimchir temeden atema inyaker aikati sign süa lir.

Ajisüaka 21 Wilberforce nung Communications Director, Lou Ann Sabatier-i, parnoki temepishiba shidiji embassy dangi e-mail asütsü, ta

metetdaksü.

Coptic Christian Arogo ka nungi Eritrea nunger adianu anabo longkak aitba sentong nungji adentsü atema Delaware (US state ka) nungi Washington tashi oa liasü.

Embassy kima longkak aiterter rongnung ka, Debessay-i, "Eritrea nung tamangba yimsü temeden mali. Yimsü nung ajemdaker reshikangshi ajangshirtem aika lir. Iba ya linük temzüng alema lir," ta metetdaksü.

US nung küm 20 jungnüa alir, Haile Tesfay-i, "Eritrea nung tensa mejungi aliba agi ni Eritrea-i maoer. Eritrea nung yimsü temeden mali. Ajakji sorkari azioker. Eritrea nung Orthodox süaka, Catholic süaka Evangelical süaka sorkari ajak amoushir," ta metetdaksü.

Embassy kima longkak aiterter jagi Khristan lenir tenet noksa denji külemi "Parnok 7 chiokang" ta ozülu amer liasü.

Christian Freedom International nungi Wendy Wright-i, Massawa nung aliba Rhema Evangelical Arogo nung pastor, Million Gebreselassie 2004 küm June ita nung security checkpoint ka nung apu, aser tang tashi court-i pa maitsüyonga pa küm 21 tashi tepuokdak ayur, ta metetdaksü.

Wright-isa, Eritrean Evangelical Alliance nung chairman, Dr. Kuflu Gebremeskel-a 2004 küm apu aser par Arogo office indang jabi rakzüka liasü; pa-a tang tashi tepuokdak lir, ta metetdaksü.

Wright-i, Gebremeskel ya mapang talangka tepuokdak aliba mapang nung diabetes densema temang nung timtem balala adokogo, ta metetdaksü.

2004 küm Orthodox putir, Rev. Gebremedhin Gebregiorgis-a pua liasü. Local oshi nung sayutsüngiba atema pa pua liasü.

Ano Orthodox putirsa, Rev. Tekleab Menghisteb-a 2004 küm pua liasü.

Full Gospel Church nung pastor, Rev. Kidane Weldou-a

2005 küm pua liasü.

Orthodox putir, Dr. Futsum Gebrenegus-a 2004 küm apu. Eritrean Orthodox Church asüngsashitsü atema inyakba nung shilem agiba atema pa pua liasü.

Evangelical lenir aser taoba mapang World Vision nung accountant, Rev. Haile Naizge-a 2004 küm pua liasü.

Advocacy group Katatismos Global nungi Faith McDonnell-i, lai 2005 küm nunga Eritrea nunger Khristan lenirtem apuba anema Washington nung Eritrean Embassy kima longkak aitogo, ta metetdaksü.

Hokolbarnü 'International Day Commemorating Victims of Acts of Violence Based on Religion or Belief' anogomong nunga linük aika nung melungtet telok balalai Eritrea nung Arogo lenirtemji chioktsü atema longkak aitba sentong balala ayongzüka agiogo.

August 22 anogo nung HMK Switzerland-ia Geneva nung Eritrean embassy kima longkak ait, National Christian Evangelical Alliance of Sri Lanka-i Colombo nung online ajanga sarasadem sentong ka agi, Nigeria nung Christian Solidarity Worldwide Nigeria aser Texas nung Freedom Seekers International-ia sarasadem sentong ayongzüka agi.

Open Doors-i France, Italy, Denmark, Canada aser Sweden linüktem nung campaign ayongzüka agi; Sweden nung Set My People Free, Voice of the Martyrs Canada aser Voice of the Martyrs Poland, International Christian Response (ICR)-i United States nung sentong balala ayongzüka agi.

Tang alima nung Khristantem atema linük tamajungtiba 50 rongnung Eritrea ya jenjang 6buba nung lir (Open Doors' World Watch List). U.S. State Department-ia iba linük ya Country of Particular Concern (CPC) List nung züngoka lir.

ANO GO ABEN TSÜNGREM DEN

Temeim aliba lokti nungdaker

"Nenoki medemer o medemer na meimtepra, ajangla iba jagi nenok kü nütsüng ta ajaki metettsü" (Yn. 13: 35).

Asenok telungjem nung, tesayuba nung merüka ayutsü aser tenzükbba nung tenendak alitsü jembir. Saka temeim kong ali ? Telemsatep maliba lokti tentet ka tanü asenoki asoshi nungdaker.

Efesa arogoi tesayuba nung akanga aser tenzükbba nung mazüangi liaka Khristan asoshi tekümdangtsü iba arogo nem agütsü. Kechiaser tamangertemi mezüng temeim toktsü. Parnoki temulung memeyipra iba yimti nungi arogoi samadaksütsü tashi tekümdangtsü agutsü. (J. Adok 2:1-5). Tanü asen arogo Efesa arogo den kecha balaka masü. Ajak kar, saka temeim nungdaker. Asenok külemi sentepba nükjidongji temeim jangrudaksütsüba aser mapa tajung inyaksüba (Ibri 10: 24, 25). Meimteptsüba tatenzükbba nungi Tsüngremi asenok nem agütsüba osang (1 Yn. 3:11; 2 Yn 5). Asenoki taidok agütsüteptsüla, khu benteptsüla, ajungshiteptsüla, agizükteptsüla aser kati ka asoshi sarasademsütsüla.

Mapa agi asenok temeim sayudaksütsüla lenmang kaji asenok akaba rongsen agi nungdakba pur atalokdaksütsüla (T.M. 2:44-45). Temeim agi sünga aliba arogo kaji metsü ama aser tesangwa lir. Yamaji asenok dak metsü tanang ketdaksütsüla aser tenem kolak nung tesangwa ka ama asütsüla.

'Focus on the Family' ministry tentetsang, Dr James Dobson süogo



August 22, 2025: Evangelical lenir aser 'Focus on the Family' ministry tentetsang, Dr James C. Dobson alima nungi pilaogo; pa arrshi küm 89 liasü.

Brihostibarnü pa Colorado Springs, Colorado nung par kidang lia asü, ta Dr James Dobson Family Institute (JDFI)-i metetdaksü.

Dobson ya mezüngbu child psychologist inyaka liasü. 1977 küm pai 'Focus on the Family' ministry tenteta liasü aser tanüba iba ministry ya United States nung evangelical ministries tulutibatem rongnung ka lir.

Iba ministry nung mapang ka nungbo staff 1,000 dak tali liasü.

JDFI nung public policy vice president, Gary Bauer-i, "Dr. Dobson ya mezüngpur ka liasü, pa ajanga tamang jenjang, kibong aser loktiliba yangerba tsütsü temelenshi tulu bener arutsüogo. Pa tasütait lenir ka liasü, ochishir ka aser temeim aliba lenir ka liasü. Kanga melenshia aliba lima ka nung pa ajanga kibong aika nung temelenshi adokdaksüogo. Pa

ya tesayur ka, counselor ka aser tensa mapang ajak nung ochishia ola adoker ka liasü," ta metetdaksü.

2010 küm pai 'Focus on the Family' ministry nungi anenba sülen pai Dr James Dobson Family Institute tenteta liasü aser maneni Family Talk radio program nung shilem agi.

Dobson-i pa akumli piyong tamang jenjang, kibong aser sobaliba yangerba tsütsü tebilemtsü onüktem atema inyaka aruogo. Pa US Tir, Donald Trump indang Evangelical Executive Advisory Board nunga inyaka liasü.

Dobson-i kibong yangerba aser Khristan nütsüngsüba dak sendakba nung kaket 70 züluogo aser item kakettem rongnung The New Dare to Discipline, The New Strong-Willed Child, Bringing Up Boys, Bringing Up Girls aser When God Doesn't Make Sense kakettem densema lir.

Dobson-i pa kinüngtsü Shirley den chirmur ana- Danae aser Ryan na aser semchir ana toktsür pilaogo.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Tesülen

(adv) tejakdang masü, tangar memenep (behind others)


* Onok tenla kidang tesülen amener.

Tesünen

(v) mulung machiba yimya (sign of bitter feeling)

* Tesünen yimya keta alirtem pelaa malir.

OLONG PAITEP # 7248



TIPIEN

1. Tangar tenzüka alir - (5)
5. Ibai shi asodang inoktsü junger - (6)
7. Nung ta asüba inyaknüsang - (6)
11. Tesem - (4)
12. Süngjang o temechi na tsüngda - (4)
15. Meyipa ashi - (6)
17. Ako - (6)
18. Mi aplok - (5)

LANGTSÜNGLEN

2. Ola tashii madok - (4)
3. Aikabo masü - (3)
4. Ter nung ti endok - (3)
5. Tejakleni masü - (9)
6. Akhidang chiyungba auso - (6)
8. Angateta aru - (5)
9. Amangbapur tentet - (5)
10. Shi nung masü - (6)
13. Junga tashi maküm - (4)
14. Remdak - (3)
16. Tanaben tenzük - (3)

OLONG PAITEP # 7247 TELANGZÜBA


TIPIEN :

1. Tanga, 6. Wara, 7. Rajang,
9. Anük, 10. Jenjang, 11. Alar,
14. Ngashi, 15. Nala, 16. Mechi.

LANGTSÜNGLEN :

2. Anga, 3. Yabang, 4. Tarok, 5. Orak,
8. Ainer, 9. Anema, 10. Jabili,
11. Among, 12. Miim, 13. Anem.

NAI-A YA METETTER MA



Ut (camel) yagi tzü mejemi mapang talangka taküm alitsü akok, saka ano Ut dangbo Koya yagi tzümejemi mapang talangba taküm alitsü akoker !



Agartala, August 22, 2025: Brehostibarnü Tripura nung Khowai district kübok tesem kar meita aoba mapang Assam Rifles aser Customs ketdangsürtem longjemer methamphetamine tablets talep tulu ana puogo. Ken o dak sendakba nung gari anisang densema temesepba mozü shibelener pezü apu. Ketdangsürtemi ashiba agi, parnoki tablets 20,000 shi puogo, koba sen crore 2 alang asütsü.

Manipur nung Naga nunger lokti tentetemi centre den ajuruteptsü

Imphal, Luroi/August 22 (TYO): Manipur nung Naga nunger lokti tentet tongtiba United Naga Council (UNC) züngsemtemi New Delhi nung August 26 nü Centre sorkar ketdangsürtem den ajuruteptsü lir. Senden nung Naga nunger aliba tesemtem nung Free Movement Regime (FMR) aser arrtsü nung atsü atsüba indang sensak asemtsü.

UNC nungi züngsemtem ya UNC tir Ng. Lorho-i anir aotsü. Züngsemtem rongnung UNC working committee züngsem tejentem, All Naga Students' Association, Manipur (ANSAM), aser Naga Women's Union (NWU) züngsemtem densema alitsü.

Sensaksem nung Samson Remei (Convenor, UNC

Working Committee), Vareiy Shatsang (General Secretary, UNC), Th. Angteshang Maring (ANSAM President), aser Ch. Priscilla Thiumai (NWU President) nungeri shilem agitsü.

Sensaksem mapang Naga nunger litsü nung arrtsü atsü atsüba aser FMR aginba ajanga tetsükdaksü adokbatem indang sensak asemtsü imlar. FMR ajanga India aser Myanmar naprongla nung Naga nungertem kecha tetsükdaksü makai senzusenponga inyaksangshia aruogo.

August 16 nü UNC representatives aser Union Home Secretary Ajay Kumar Bhalla na senden ka amenba sülen tang iba senden ya ayongzükogo. August 16 nü Bhalla-i formal sensaksem ka

yakta akatsü tenangzükba agüja liasü.

August 11 UNC-i, sorkari ken o dak sendakba nung jenjang tapet magira parnoki jenjang agitsü aser anogo 15 tsüngda ken o mebentetsüra longkak aittsü sentong yanglur aliba metetdakja liasü.

Manipur aser Myanmar na arrtsü km 398 lir aser tang tashi nung Moreh jila anasa arrtsü nung atsü km 9 bo atsüogo aser ano atsü küm 21 shi tang lenmang den külemi teyangludak lir.

FMR koba ajanga linük anaprongla nung km 40 tashi sadem sadema senzütsü atema temelaba agütsür liasü, iba inyakyim ya 2004 küm km 16 dang kümtsü aser tang tashi memelenshi lir.

Assam nung Japanese oshi training centre tem amenoktsü

Guwahati, Luroi/August 22 (Agencies): Assam sorkari November ita nungi tenzüka Assam nung Japanese oshi sayutsü atema training centre tem amenoktsü, ta Chief Minister Himanta Biswa Sarma-i Brehostibarnü metetdaksü.

Chief Minister Himanta Biswa Sarma-i iba osang ya Sootea Divas amungba mapang metetdaksü, kong Sarma-i state nungi nüjiso atema raratem nem tetushi agüja liasü.

Japanese oshi sayutsü atema training centre tem

amenokba ajanga lanurtem skill development atema lenmang tasen lapoktsütsü.

Sorkar ketdangsürtemi ashiba agi, iba inyakyim ajanga Assam nunger kaketshirtem aser professionals tem Japan nung oa mapa inyaksü aser India nung Japan den sendaktepa aliba industry tem nung mapa inyaksü atema kishi lapoktsütsü.

Sarma-isa, state industrializ asütsü merangba ya industrialists tem tejangraba kisüng agi anir masü saka mapa balala atema tangaleni or aliba

lanurtem atsüa arutsü atema dena meranga inyakdar

Japanese oshi amala skill tem angazükdakja iba inyakyim ajanga lanurtem bendanglen pei career yanglutsü atema maongka agütsütsü meranger.

Iba jenjang agiba ajanga Assam tali renloka okdaksütsü aser shisaluyim aser mapa dak sendakba nung maongka tasen agütsütsü.

Japan den longjemer inyakba ajanga Assam tarutsü nung linük balala den tesendaktep tashi taitba akümtsü.

Manipur police personnel ration allowance ajungkettsüogo

Imphal, Luroi/August 22 (Agencies): Manipur nung Governor-in-Council-i Manipur Police Department nung personnel tem indang itashi monthly ration allowance ajungkettsütsü benokba agizükogo.

Ken o dak Manipur Rifles, India Reserve Battalion, Civil Police, Manipur Police Telecommunication Organisation, Central Motor Transport Workshop, aser Village Defence

Force sendaka lir.

Iba inyakyim ya 2025 küm September 1 nü nungi tenzüka inyaksangshitsü. Personnel tem nisung shi ita shia sen 2000 ngua aliba 2,500 angutsü aser iba atema state-i ita shia sen crore 2.1 agütsütsü. Manipur Police force nung personnel 42,000 shi lir.

Director General of Police sangdong ka ajanga ashiba agi, iba jenjang agiba ya sepaitem ajangzükdaksütsü atema

tongtibang jenjang ka agiba lir aser iba ajanga sepaitem tali ajungmesotsü, shirnoki taoba küm anaser ita asem tashi state nung temzüng ozüng shitak benoktsü atema kanga bendanga agüja inyaka arudar.

Manipur Police Department-ia, iba inyakyim ajanga sepaitem mapa aser parnoki bendanga agüja inyakba agizükba atema state sorkar dang kanga pelaba lemsatepa liasü.

Taoba Sri Lanka Tir Wickremesinghe puogo



Colombo, Luroi/August 22

(Agencies): Sri Lanka tir inyakba mapang nübur meyong sen mashi lenmang nung amshi ta tai tonglokja aliba mechi taoba tir aser opposition lenir Ranil Wickremesinghe Hokulbarnü puogo, ta police ajanga ashir.

Wickremesinghe, shiba asetkong linük nung tir ama 2022 nungi 2024 tashi inyaka liasü, pai linük nüngdak atema US semdangba sülen tebutüsü graduation sentong nung adentsü atema London-i aodang nübur meyong sen amshi ta tai tonglokja apu, ta police odongtar Fedrick Wootler-i osangbener

dang ashi.

Wickremesinghe ya Financial Crimes Investigations Department ajanga apuba sülen court kati bener ao, ta taoba tir den yariteper Danushka Ramanayake-i ashi.

Taoba küm Sri Lanka tir akumsang Anura Kumara Dissanayake'er sorkari tesüiba sorkar nungi ochimashi mapa inyakba nung tai tonglokja alirtem merenshitsü ta nangzüker iba ama tai tonglokja alirtem pua bushisüngdangba rongnung Wickremesinghe ya taoba Sri Lanka tir aser tematiba mapa inyaker mezüngbuba alitsü.

Taoba küm September ita tir election nung Dissanayake-i takok angu, kong tejenpur-i linük sensak tiaí anir aor, ta voters temi shia lanur aser tejak tasen timba shi. Ita ana lir par party-i parliamentary election nunga takok tulu ngua sorkar tashi tait ka tentet.

Ochimashi aser tim masü mapa inyakba nung tai tonglokja taoba sorkar nung yimten yimsüsür aser sorkar ketdangsür ter dak tema pua bushisingdangba mapang lir.

Sri Lanka rongsenketzüng jenjang mejungi akumba yong yimtenren tsütsü mepetmesü adoka 2022 küm tir Gotabaya Rajapaksa mapa nungi anenba sülen Wickremesinghe ya tir akum.

Wickremesinghe-i linük rongsenketzüng tajungba kumdaktsü ta tenüing asanger, kong pa lenisüba kübok local currency tashi taitba akum aser foreign reserves timba akum. Saka pai taxes aser utility bills tali meshiba ajanga kanga aitsür.

Pakistan, China aser Afghanistan tesendaktepakangshitsü pangjemer

Islamabad, Luroi/August 22

(Agencies): Yimtenren aser rongsenketzüng tesendaktep tali tashi itshitsü nükjidong nung Pakistan, China aser Afghanistan nungi ketdangsür tem Bodhbarnü Kabul nung senden amendang kiralongra anema tashi taitba nung teka amteper nokdaktsü züngzüktep, ta Pakistan indang foreign ministry ajanga ashi.

Linük aseme trade, transit, regional development, health, education, culture aser temesepba mozü shibelenba anema raraba nung tali tajungba teka amteper inyaktü pangjemshi, ta Islamabad nung Pakistan indang Ministry of Foreign Affairs ajanga sangdong ka nung ashi.

Parnokisa taoba mapang züngzüktepa aliba China-

Pakistan Economic Corridor ya Afghanistan tashi aotsü pangjemshi, ta ashi.

Kabul nung Taliban sorkari ayongzüka Pakistan Foreign Minister Ishaq Dar, China Foreign Minister Wang Yi aser Taliban lenirtem senden amenba indang osang tejangja parnoki magütsü.

China-Pakistan Economic Corridor nungya China anüolen Xinjiang region aser Pakistan nung Arabian Sea tsütsü Gwadar rongnendak leman aser rail tesendaktep tajungba akumtsü dena lir. Iba corridor ya ajanga shiranga aliba rongsenketzüng asendenshitsü asoshi China nunger investment tali atsür aruba nung yaritsü imlar aser Afghanistan tashi atsülangba ajanga Central Asia den

shishilempaba tajungba akumtsü, ta Pakistan ketdangsürtemi tawa shia lir.

Afghanistan nung Taliban sorkar ya Russia-i mezüing agizüker ita ka dak tema lir iba senden ya amener. Russia dak alaka linük katia Taliban sorkar ya tejangja ta agizüka mali, saka Taliban-i linük aika den jembishinüa arur aser China aser United Arab Emirates dena linük kar nung diplomatic tesendaktep amenokogo.

Iba senden nungya political, economic aser regional cooperation dena ken o aika kanga junga jembishinütsü, ta Afghanistan indang Ministry of Foreign Affairs ajanga taoba mapang shia liasü.

Linük asem tsüngta tatemsa senden amenba ya May ita Beijing nung liasü.



Office of the
MOLUNGYIMSEN SENSO MUNGDANG
P.O. Tuli, Mokochung : Nagaland

TENÜNGSANG AGÜTSÜR

Molungyimsen Senso Mungdang-i tsünglanglen agüja alirtemi pei inyakba wadang nung jenjang temabai atuba aser takok anguba atema tenüngsang tulu agütsür aser yimkong asoshi konang bentsür aruba atema pelaba metetdaksür.

- Asür Simon aser Wt. Arenjenla na jabaso **Wb. Temsutoshi**-i Department of Agriculture, GoN nung Deputy Director nungi Joint Director jenjang atongba.
- Asür C. Imtinungsang Nokdir aser Wt. Imtiongla na jabaso **Wb.Aripong Ao**-i Department of Agriculture, GoN nung A.O. nungi SDAO jenjang atongba.
- Wb. J. Bendang Sanglir, IPS, IGP (Retd.) aser Wt. Tiala Aier na jala **Kr. Moarenla Sanglir**-i NSSB ajanga agiba Clerical and Allied Services tatidang nung takok ngua Food and Civil Supplies kübok Sub-Inspector mapa anguba.
- Wb. Jenkanukshi aser Wt. Medemkala na jabaso **Wb.Pangerkumba Ao**-i Assam Regiment nung Subedar jenjang anguba.

Tsüngremi nenok taküm aser wadang maneni moajangma.

Sd/-
N. Joseph Lemtur.
President

Sd/-
B. Imsuinba Jamir
Secretary

Yimjung asoshi security guarantor ama China madentsü: Zelenskyy



Kyiv, Luroi/August 22

(Agencies): Ukraine nung rara tembangtsü asoshi Russia den tarutsü nung yimjung tezüngzüktep kar yanglununga China bo security guarantor ka ama masütsü, ta Ukraine Tir Volodymyr Zelenskyy-i ashi.

Rara tembang ka asünungbo tarutsünung Ukraine nung peacekeeping force komaba amenoktsü ta tan hopta United States aser European lenirtem tsüngta sensaksemba sülen Ukraine tiri iba o ya ashi.

"Kechiba guarantees nung China mali? Mezüngbuba nung, China-i tetenzük nungi iba rara anendaktsütsü asoshi meyari," ta Zelenskyy-i Brehostibarnü osangbener dang ashi.

"Tanabuba nung, Russia-i drone market lapokba nung China-i yari," ta pai ashi.

Beijing-i Ukraine rara nung yimjung pangzüng ka yanglutsü asoshi ayongzüken ayongzüka arur, saka pari tanen makai rongsenketzüng tsütsü Russia yariba ajanga Zelenskyy aser anüolen lenirtem matsüngdang par neutral ama aliba noksa raksar.

Beijing-i linük balala raraba nung yimjung asoshi tetsüngtai aitsü mangdang liaka, Ukraine leniri ashiba ajanga Russia-Ukraine yimjung inyakyim nung China shilem kecha mali ta sayur.

Yimjung tezüngzüktep yangluba sülen Russia-i tarutsü nung Ukraine mamaktsüsa international security guarantors temi inyaktüla aser shilem agirtem ya Russia-i 2022 nungi amakdang Kyiv yariba linüktem nungi asütsüla, ta Zelenskyy-i

ashir.

China-i Russia nem nok-nü agütsür aser nok-nü yangluba nung yarir ta Zelenskyy-i April ita tai tongloktsü, koba Ukraine tiri indang-indanga tai tongloktsüba mezüngbuba alitsü.

China Foreign Ministry odongtar Mao Ning-i yamaji meinyaker ta ashi aser iba ama tai tongloktsüba ya tamendak dak maka aser yimtenren tsütsü kelak-kepong mapa inyakba lir ta ashi.

Taoba mapanga Beijing-i Russia mitkar nem missiles, tanks, aircraft aser danga nok-nü yanglutsü asoshi tongtipang oset agütsür, ta US-i tai tonglokja liasü.

Taoba mapang China-i "dual-use components" tem dang ayok ta shia liasü, koba civilian aser mitkar nüngdak nung amshir.

Ajisüaka Russia Tir Vladimir Putin aser China Tir Xi Jinping tesendaktep tajung aliba yong iba rara nung Beijing shilem agir ta temulung malemba ya lia arur.

Ukraine amaktsü hopta ishika lia Putin-i Beijing nung Xi ajurua linük ana tsüngta "no limits partnership" zülutepa liasü.

Iba sülen linük balalai temerenshi tenokdangba agüjaka Russia rongsenketzüng tashi ita alitsü asoshi China-i yaria arur.

Russia nem temerenshi aser tenokdangba agüja aliba paidokba nung yaria China-i energy, electronics, chemicals aser transportation components maneni shishilempar, ta EU aser US nati aitsür.



Ukraine den Russia asoshi raraba mapang North Korea nunger sepaitem asüba nem North Korea lenir Kim Jong Un-i akhum agütsüba mapang tangokba noksa ka yangi angur.

Man City defender Dias-i tenangzüktepba yanglushiogo



Luroi/August 22, 2025 (Agencies): Manchester City defender Ruben Dias-i club den küm ana atema tenangzüktepba yanglushiogo.

Arishi küm 28 tain asayar indang contract ya 2027 küm tembangsü liasü, saka tang tenangzüktepba yanglushiba sülen pa club nungi ano 2029 küm tashi asayatsü aser maneni küm ka atsülangtsü asoshi lenmang sadema lapoka yuogo.

Portugal nunger international asayar ya 2020 küm Benfica

nungi pound million 65 agi alizük aser mezüngbuba season pa nem Premier League player of the year naroküm agüja liasü.

Defence nung asayasang yagi club nungi küm pongu asayaba mapang league pezü, Champions League, EFL Cup aser FA Cup akokba mapang City nem teyari tulu agütsüogo.

"Tanü ni kanga pelar. Ni Manchester meimer- iba ya tangbo kü ki kümogo aser ni Manchester City fans tem meimer," ta Dias-i ashi.

"Ni idaki asayaba mapang takok marnok akokbatem aser onok asayaba yimya bilemdangra ni iba club dak alaka tanga club kecha nunga masayaner," ta pai ashi.

City indang director of football Hugo Viana-i ashiba agi, Dias ya dressing room aser asayaba moapu nung lenir ka lir.

Kasa mapang nung club-i taruba itatem nung John Stones aser Bernardo Silva na tarutsü atema-a asadangtsü imlar, kechiyong tenaprongla küm kaka dang asayatsü anunga lir. Maneni Ilkay Gundogan aser Ederson nati ita 12 majung dang asayatsü lir.

Spain nunger midfielder Rodri, England nunger playmaker Phil Foden, Swiss nunger defender Manuel Akanji aser Dutch nunger centre-back Nathan Ake nunger ajak ano küm anana asayatsü lir.

Defender Rico Lewis-a ano küm pongu atema tenangzüktepba yanglutsü ana nung lir.

Supreme Court-i AIFF & FSDL dang MRA ken o bentettsü tuyu

Luroi/August 22, 2025 (Agencies): Supreme Court-i Hokolbarnü All India Football Federation aser Football Sports Development Limited na dang Master Rights Agreement dak sendakba nung mangatetep aliba bentettsü tetuyuba agütsüogo, koba ajanga Indian Super League mapang telatetka makai thinener lir. Ken o ya maneni August 28 nü angadangtsü.

Justice Sri PS Narasimha aser Justice Joymalya Bagchi nati iba tetuyuba ya agütsü aser taruba hearing atema anogo latetja liasü.

Federation aser Football Sports Development Limited na MRA dak sendakba nung ken o mebenteti lir, koba India nung tebur football league tematiba ISL indang administrative backbone lir.

Tang benoka aliba Master Rights Agreement ya December ita tembangsü aser MRA tasen ka atema tenangzüktepba meyangluba sülen Indian Super League 2025-26 season ya July 11 nü sota ata lir.

Ibayongji Indian Super League club 13 nungi 11-i ISL

masayara takoksa tulu ajangshitsü jangja parnok inyakyim anena lir.

Kasa mapang nung International Soccer Players' Union FIFPRO-i Mongolbarnü India nung club football asaya jenjang mejangjaba süoki ia bilemba lemsatepogo aser iba mangatetep ya takaratiba nung bentettsü ayongzükogo, koba ajanga India nung football asaya tarutsü amokmerener.

Club football tang mepetmesü nung lir kechiyong Indian Super League tarutsü mejangja aser asayar lokti tentetemi stakeholder tem dang iba ken o ya longjemer bentettsü mepeshia metetdaksüogo.

ISL organisers FSDL-i July 11 nü 2025-26 season sota atatsü atema telemtetba agiba sülen club aseme inyaksangshi anena first-team asayar aser staff tem nem itasen agütsü anenogo.

FIFPRO-isa, asayartem ozüing alema parnok indang employment contracts thitsüogo. Iba inyakyim ajanga asayartem labour rights nung aibelenogo, ta ashi.

Navi Mumbai nung tetsür World Cup asayatsü

Luroi/August 22, 2025 (Agencies): International Cricket Council-i Hokolbarnü sangdong ka ajanga taküm tetsürtem 50-over World Cup atema Bengaluru nung Chinnaswamy Stadium melena Navi Mumbai nung DY Patil Stadium shimba sangdongogo.

Taküm iba asayamung ya September 30 nü nungi tenzüka India kübok tesem pongu nung asayatsü lir.

"Chinnaswamy Stadium atema temelaba magitetba ajanga tetsürtem 50-over World Cup atema Navi Mumbai shimogo. ICC-i India aser Sri Lanka na nung asayatsü aliba ICC Women's Cricket World Cup atema mapanglem melenshiba sangdongogo. Team ti asayatsü aliba asayamung

atema Bengaluru melena Navi Mumbai shimogo, koba Sept 30 nü tenzüksü," ta ICC-i Hokolbarnü sangdong ka ajanga metetdaksü.

Karnataka State Cricket Association (KSCA)-i asayatem atema Chinnaswamy Stadium amshitsü asoshi temelaba magitetba sülen 2025 Women's World Cup asayatem Bengaluru nungi belenerogo. June 4 nü RCB pur victory march mapang lendong tulu atalokba sülen iba stadium amshitsü atema temelaba magitet.

Chinnaswamy melena DY Patil Stadium nung asaya pongu asayatsü. Iba ground nung Bangladesh aser Sri Lanka na October 20 nü, India aser New Zealand na october 23 nü, India


aser Bangladesh na october 26 nü, tanabuba semifinal October 30 nü aser Pakistan qualify mesüra final November 2 nü asayatsü.

Asayamung nung mezüngbuba asaya ya India aser Sri Lanka na September 30 nü mezüngbuba asaya-a tenzüksü.

Asayamung final ya Colombo mesüra Navi Mumbai nung November 2 nü asayatsü. Mezüngbuba semifinal Guwahati nung October 29 nü asayatsü aser tanabuba semifinal Navi Mumbai nung October 30 nü asayatsü.

Taküm iba asayamung nung Australia, England, South Africa, New Zealand, Bangladesh, Pakistan, India aser Sri Lanka asayatsü.

Bournemouth-i Morocco nunger winger Adli alizükogo



Luroi/August 22, 2025 (Agencies): Bournemouth-i Morocco nunger winger Amine Adli, German club Bayer Leverkusen nungi alizükogo, ta Premier League club yagi Brehostibarnü metetdaksü. Pa den küm pongu atema tenangzüktepba yangluogo.

Pa sen kwi agi alizük, iba indang osang tejangja magütsü, saka British media sangdong balala ajanga ashiba agi, arishi küm 25 tain France nung asoba Morocco nunger international asayar atema ya pound million 25 shi agütsür alitsü.

Bournemouth-i taruba season atema Ben Gannon-Doak, Adrien Truffert, Dorde Petrovic aser Bafode Diakite nunger alizüker liasü aser tang Adli parnok den denogo.

Club nungi Dean Huijsen Real Madrid-i ao, Milos Kerkez Liverpool-iao aser Illia Zabarnyi Paris St Germain-i ogo.

Adli ya senior team nung mezüngbuba French club

Toulouse nungi asaya tenzük aser 2021 küm Leverkusen-i oa liasü. Pa iba German cub nungi 143 ben asayaba mapang goal 23 idaktsü aser assist 25 süja liasü. 2023-24 season nung parnoki domestic league aser Cup akokba nung pai teyari tulu agüja liasü.

"Amine ya takoker ka lir aser pa ya ozü squad atema kanga tongtibang asütsü," ta Bournemouth indang President of Football Operations Tiago Pinto-i ashi.

"Pa temaba jenjang nung asayaba asayar ka lir aser pa nükjidong aser onok nükjidong mesükteper," ta paisa ashi.

Honibarnü Premier League nung Wolverhampton Wanderers den masaya tsüngda Adli Bournemouth nung denogo. Bournemouth pur taoba season tekububa nung tembang aser season tasenba nung parnok mezüngbuba asaya nung Liverpool goal 4-2 agi mekoki liasü.



Kohima, Aug 22 : Peren district nung Ngwalwa Circle kübok Gaili nung 1buba Inter School Chess Tournament asayaba sülen takokertem aser ketdangsürtem tangokba noksa nung angur.

BOX Winners :

Champion : Akangzang Haikam, Springfield School (6.5 points)

1st Runner up : Ilicang Haikam, Springfield School (6 points)

2nd Runner up : Ilung Haikam, Springfield School (5.5/ 34 BH points)

4th position : Suiyilungbe, Springfield School (5.5/ 23.5 BH points)

5th : Keyilelungbe, GMS Gaili (5/ 32 BP points)

8th : Mamnum Alom, GMS Gaili (5/ 28 BH points)

6th : Maheipeung, GMS Gaili (5/ 29.5 BH points)

9th : Iheibe, GMS Gaili (5/ 27.5 BH points)

7th : Lunghei, GMS Gaili (5/29 BH points)

10th: Vekutolu, GMS Gaili (5/ 24 BH points)

BILEMDANGANG

"O khien jembizüka yokra meyipa magiteter."